

Fiscal a pidi 60 luna di prison combina pa periodistanan local sospechoso den caso di soborno

Ayer den corte a tuma luga tratamento di caso den cual cuater periodista local ta sospechoso di, entre otro, soborno di agente policial y participa na un organisacion cu intencion pa comete crimen y/of soborno di un ambtenaar (polis). E caso aki ta relaciona cu e caso di ex-agente policial R.Vos ken ya caba a keda condena.

E sospechosonan di inicial R.P.L., B.L.R.K., N.E.A.G. y N.M.Q.C.d.A. ta acusa di, for di periodo di prome di januari 2021 te cu 22 di maart 2023, conhuntamente intencionalmente a viola secretonan cual nan tabata sa cu e ambtenaar, relaciona cu su funcion, tabata obliga pa tene. Nan ta acusa di, den e periodo ya menciona, a participa den un organisacion cu tabata consisti di un y/of mas otro persona cu tabatin como



meta pa comete crimen, esta, corrupcion di un ambtenaar y/of tuma y/of duna soborno y/of maluso di funcion y/of violacion di secreto di trabao.

Fiscal a pidi e castigo di prizon incondicional 24 luna contra e sospechoso N.M.Q.C.d.A. Ademá fiscal a pidi pa e wordo hiba cera

mes ora ora di dicta sentencia. Contra e sospechosonan R.P.L. y N.E.A.G. a exige un castigo di prison di 18 luna, di cual 8 luna ta condicional, cu un tempo di prueba di 3 aña. Contra e sospechoso B.L.R.K. a pidi un castigo di prison condicional di 6 luna, cu un tempo di prueba di 3 aña y 240 ora di trabao pa co-

munidad. Segun e noticiero local, Noticia Cla a reporta, den su rekisitorio e fiscal a indica cu e ta kere hopi cos y informacion a ser comparti entre e agente Vos y e periodistanan, pero cu mester por demostra cu prueba cu loke a sucede ta ilegal. Segun e fiscal e trafico di informacion colecta di WhatsApp entre e sospechosonan durante un luna tabata suficiente pa tin un idea di e operacion cu tabatin entre e polis y e sospechosonan.

E noticiero a reporta cu e fiscal a sigui bisa cu den hopi caso ora tende e palabranan 'miembronan di organisacion criminal' ta imagina un grupo di hende arma, estilo pelicula cu intencionnan violento. Pero el a splica cu den termino hudicial, e ta nifica cu dos hende cu ta malversa of konkel cifranan di contabilidad den un compania ta

suficiente pa ser mira como miembro di un organisacion criminal.

Sospechosonan tin derecho di zwijsrecht, esaki ta nifica derecho pa keda keto. Dos di e sospechosonan a haci uso di e derecho aki, pero segun e fiscal e derecho aki tin consecuencia negativo pasobra no ta crea claridad den un acto y hopi biaha ta conduci na un veredicto di culpabel.

Hues a resalta cu pa sospechoso N.M.Q.C.d.A esaki no ta prome biaha involucra den un caso asina. Segun e portal a indica hues a splica ya caba el a haya un sentencia leve, castigo di prison condicional y trabao comunitario, pero ta parce cu e no a siña su les.

Huez lo cera e investigacion y lo dicta sentencia riba 18 di december riba 2024 pa 8.15'or di mainta.

Mientras cu a enfoca riba algun topico, algun otro tema di gran importancia a keda afo durante e debate politico di KvK

Diahuebs anochi a tuma luga e debate politico organisa pa Camara di Comercio (KvK) conhuntamente cu Universidad di Aruba. Un total di 10 partido, di 11 cu ta participando den eleccion a tabata presente, cu AVP como e unico partido cu no a presenta.

E debate politico organisa pa Camara di Comercio (KvK) durante campaña electoral a bira casi un tradicion, ya cu ta organisa esaki pa hopi aña. Custumber di e gremio comercial ta pa lidernan di cada partido participa representando nan partido.



Evelyn Wever-Croes, MEP; Miguel Mansur, ACCION21; Marisol Tromp, MAS; Ursell Arends, RAIZ; Otmar Oduber, PPA; Gilbert Webb, HTC; Eric Ras, CURPA; Gerlien Croes, FUTURO; Ricardo Croes, RED; y Rycond Santos do Nascimento, LPR tabata e lidernan cu a representa nan partido durante e debate.

E debate tabata consisti di tres diferente tanda durante cual e politiconan tabata expresa nan punto di bista riba algun ponencia y contesta algun pregunta. E aña aki KvK

a introduci un cambio den e manera cu e debate politico a bay tuma luga. Ta trata cu cada lider di partido por a bin cu un candidato for di e lista di partido pa tambe participa den e debate, den e caso aki den e di dos tanda.

Otro aspecto interesante di e debate politico e aña aki tabata e oportunidad cu cada lider di partido tabatin pa haci un pregunta di su escogencia na cualkier otro lider di partido di su escogencia. E parti aki tabata un aspecto nobo y uno cu a resalta pa e lidernan cu a participa durante e debate. Algun politico a tuma e oportu-

nidad pa haci preguntanan fuerte na nan colega politico mientras cu algun otro tabata mas suave.

Mester resalta cu mayoria di e lidernan di partido a dirigi nan pregunta na prome minister demisionario y lider di partido MEP, Evelyn Wever-Croes, ken tambe a reconoce esaki gradiciendo e otro lidernan pa e atencion cu nan a dun'e y oportunidad pa papia y duna mas splicacion.

A pesar cu e debate a cuminsa cu un tono bastante pica, algun ciudadano a expresa riba rednan social cu a spera di

mira un poco di e aspecto di 'debate cayente' entre e lidernan y a sinti cu no a toca algun punto di preocupacion.

Topiconan cu a bin dilanti durante e debate tabata finanzas, vivienda, enseñansa, adultonan mayor y corrupcion. Un di e topiconan cu no a bin dilanti y cu ta uno cu ciudadanonan ta considera hopi importante ta e tema di migracion y personanan indocumenta na e isla. Un topico cu hopi ta considera por tin un efecto riba nan decision pa ken nan lo vota.

Durante e debate publico por a vota pa cual lider politico a gana e debate. Segun e cantidad di votonan cu a dreña, lider di partido MEP, Evelyn Wever-Croes, a gana e debate. Na di dos luga tabata Gerlien Croes, partido FUTURO, na di tres luga Otmar Oduber di partido PPA.

